


Pengenalan

Buku Anggaran Perbelanjaan Kerajaan Persekutuan 2022 mengandungi penyata Anggaran Perbelanjaan Kerajaan Persekutuan yang merangkumi Perbelanjaan Mengurus dan Pembangunan bagi semua agensi Kerajaan Persekutuan untuk tahun 2022.

Peruntukan 2022: Agihan Anggaran Perbelanjaan Persekutuan

Sejumlah RM311.10 bilion diperakukan di bawah Anggaran Perbelanjaan Persekutuan bagi tahun 2022. Jumlah ini merupakan peningkatan sebanyak RM3.61 bilion berbanding peruntukan tahun 2021 bernilai RM307.49 bilion. Bahagian terbesar perbelanjaan berkenaan adalah di bawah Perbelanjaan Bekalan sebanyak 50.3%, mengambil kira perbelanjaan keperluan segera untuk terus menangani kesan daripada krisis bagi tujuan keperluan dan pemulihan. Selain itu, Perbelanjaan Bekalan merupakan antara input utama Kementerian/Jabatan untuk melaksanakan program dan aktiviti yang dirancang pada tahun 2022 berjumlah RM156.41 bilion, manakala Perbelanjaan Tanggungan yang merupakan kehendak di bawah Perlembagaan Persekutuan berjumlah RM77.09 bilion (24.8%). Perbelanjaan Pembangunan yang akan menjadi penggerak kepada kegiatan ekonomi bagi tahun 2022 berjumlah RM77.60 bilion (24.9%). Selain daripada Anggaran Perbelanjaan Mengurus dan Pembangunan, Kerajaan turut menyediakan Anggaran Peruntukan berjumlah RM23 bilion di bawah Kumpulan Wang COVID-19 bagi tahun 2022. Ini menjadikan jumlah Anggaran Perbelanjaan yang disediakan pada tahun 2022 berjumlah RM332.10 bilion berbanding RM322.49 bilion pada tahun 2021.


Carta 1 : Agihan Peruntukan Perbelanjaan Kerajaan Persekutuan bagi tahun 2022



Peruntukan 2022: Agihan Anggaran Perbelanjaan Mengurus

Sejumlah RM233.50 bilion diperuntukkan bagi tahun 2022 bagi menggerak dan melancarkan pelaksanaan program dan aktiviti Kementerian/Jabatan, terutamanya dalam usaha untuk memulihkan negara daripada pandemik Koronavirus-19 (COVID-19). Sehubungan dengan itu, Perkhidmatan Awam bertindak sebagai penggerak utama kepada pelaksanaan program dan aktiviti yang memainkan peranan sebagai input terpenting Kerajaan. Oleh yang demikian, emolumen Perkhidmatan Awam Persekutuan disediakan peruntukan sebanyak RM86.51 bilion bagi tahun 2022.


Carta 2 : Agihan Peruntukan Perbelanjaan Mengurus 2022



Perincian Anggaran Perbelanjaan Mengurus 2022 Mengikut Sektor

Perincian Perbelanjaan Mengurus dipecahkan mengikut sektor yang merangkumi sektor pentabiran, sektor ekonomi, sektor sosial, sektor keselamatan dan sektor-sektor lain yang terdiri daripada tanggungan tertentu dan bayaran pindahan. Oleh kerana tahun 2022 merupakan tahun pemulihan pasca pandemik COVID-19, agihan Anggaran Perbelanjaan Mengurus 2022 memperuntukkan perbelanjaan terbesar di sektor sosial diikuti dengan sektor-sektor lain. Sektor ekonomi turut ditingkatkan peruntukan pada tahun 2022 berbanding tahun 2021 bagi tujuan memacu pemulihan sektor ekonomi yang terjejas. Hal ini selaras dengan hasrat Kerajaan untuk terus melindungi serta memulih kehidupan dan mata pencarian pasca pandemik.


Carta 3 : Agihan Peruntukan Perbelanjaan Mengurus 2022 Mengikut Sektor



Perincian Anggaran Perbelanjaan Mengurus 2022 Mengikut Sektor Pentadbiran

Sektor Pentadbiran diperuntukkan Anggaran Perbelanjaan Mengurus berjumlah RM12.32 bilion dengan agihan kepada empat (4) Sub Sektor utama seperti di Carta 4. Sub Sektor Perkhidmatan-perkhidmatan Am menerima agihan peruntukan tertinggi berjumlah RM10.16 bilion yang melibatkan anggaran peruntukan bagi tujuan penyelarasan, pengurusan dan pentadbiran.


Carta 4 : Agihan Anggaran Perbelanjaan Mengurus 2022 Sektor Pentadbiran



Perincian Anggaran Perbelanjaan Mengurus 2022 Mengikut Sektor Ekonomi

Sektor Ekonomi diperuntukkan Anggaran Perbelanjaan Mengurus berjumlah RM18.80 bilion dengan agihan kepada sembilan (9) Sub Sektor, seperti di Carta 5. Sub Sektor Pengangkutan dipertanggungjawabkan dengan peruntukan terbesar di bawah Sektor Ekonomi dengan peruntukan berjumlah RM6.53 bilion bagi perbelanjaan operasi yang melibatkan darat, laut dan udara. Selain itu, Sub Sektor Perdagangan dan Perindustrian menerima peruntukan kedua tertinggi berjumlah RM3.96 bilion bagi memastikan Jabatan/Agensi Kerajaan yang terlibat menjadi pendokong dan pemangkin dalam membantu mempergiatkan aktiviti ekonomi negara.


Carta 5 : Agihan Anggaran Perbelanjaan Mengurus 2022 Sektor Ekonomi



Perincian Anggaran Perbelanjaan Mengurus 2022 Mengikut Sektor Sosial

Sektor Sosial diperuntukkan Anggaran Perbelanjaan Mengurus berjumlah RM95.97 bilion dan melibatkan pengagihan kepada lapan (8) Sub Sektor seperti di Carta 6. Pembangunan modal insan pada semua peringkat merupakan tumpuan Kerajaan dalam setiap rancangan pembangunan negara dan ini diterjemahkan melalui pengagihan peruntukan terbesar di bawah Sub Sektor Pelajaran dan Latihan dengan peruntukan berjumlah RM59.35 bilion. Selain itu, Kerajaan turut memberikan tumpuan kepada aspek kesihatan rakyat dengan memberikan perkhidmatan terbaik dan mudahcapai dengan kos yang rendah. Oleh yang demikian, Kerajaan memperuntukkan Sub Sektor Kesihatan dan Kependudukan dengan peruntukan mengurus berjumlah RM28.32 bilion, iaitu peruntukan kedua tertinggi di bawah Sektor Sosial.

Carta 6 : Agihan Anggaran Perbelanjaan Mengurus 2022 Sektor Sosial



Perincian Anggaran Perbelanjaan Mengurus 2022 Mengikut Sektor Keselamatan

Sektor Keselamatan diperuntukkan Anggaran Perbelanjaan Mengurus berjumlah RM25.16 bilion dengan agihan kepada dua (2) Sub Sektor iaitu Keselamatan Dalam Negeri sebanyak RM14.06 bilion dan Pertahanan RM11.10 bilion, seperti di Carta 7.


Carta 7 : Agihan Anggaran Perbelanjaan Mengurus 2022 Sektor Keselamatan



Perincian Anggaran Perbelanjaan Mengurus 2022 Mengikut Sektor-sektor Lain


Anggaran Perbelanjaan Mengurus yang disediakan untuk **Sektor Tanggungan Tertentu dan Sektor Bayaran Pindahan berjumlah RM81.25 bilion**. Sub Sektor Perbelanjaan Kerana Hutang Negara menerima agihan peruntukan terbesar berjumlah RM43.10 bilion mengambil kira peningkatan dalam jumlah pinjaman Kerajaan Persekutuan bagi tahun 2022 untuk maksud perbelanjaan pembangunan dan juga bagi membiayai pakej-pakej bantuan dan rangsangan ekonomi yang diumumkan oleh Kerajaan. Bahagian kedua terbesar ialah bagi Sub Sektor Pencen dan Ganjaran berjumlah RM28.04 bilion.

Carta 8 : Agihan Anggaran Perbelanjaan Mengurus 2022 Sektor Tanggungan Tertentu



Sektor Bayaran Pindahan diperuntukkan sejumlah RM8.97 bilion dan diagihkan kepada empat (4) Sub Sektor seperti di Carta 9. Sub Sektor Bayaran Pindahan Lain menerima peruntukan tertinggi iaitu berjumlah RM6.18 bilion di mana pembayaran bagi menampung subsidi tidak langsung antaranya subsidi produk petroleum dan pengkelan harga tol yang merupakan komponen perbelanjaan terbesar di bawah Sub Sektor ini.


Carta 9 : Agihan Anggaran Perbelanjaan Mengurus 2022 Bayaran Pindahan



Arah Aliran Perbelanjaan Mengurus 2018-2022

Bagi tempoh 2018-2022, arah aliran Perbelanjaan Mengurus (termasuk pindahan lebihan hasil ke Kumpulan Wang Pembangunan) mengalami perubahan dari tahun 2018 hingga tahun 2022.

Carta 10 : Arah Aliran Perbelanjaan Mengurus 2018-2022




Nota: *Peruntukan Asal

Perbelanjaan Mengurus 2018-2022 Mengikut Sektor

Perbelanjaan Mengurus dibahagikan kepada Sektor Pentadbiran, Ekonomi, Sosial dan Keselamatan serta Tanggungan Tertentu dan Bayaran Pindahan. Bagi tempoh 2018-2022, perbelanjaan yang terbesar diagihkan kepada Sektor Sosial iaitu secara purata sebanyak 41.1% diikuti oleh Sektor Tanggungan Tertentu sebanyak 30.9%. Sektor-sektor lain menerima peruntukan seperti di Carta 11.

Carta 11 : Peratus Perbelanjaan Mengurus Tahun 2018-2022 Mengikut Sektor



Nota: 2018-2020 adalah merujuk kepada perbelanjaan sebenar manakala 2021-2022 merujuk kepada peruntukan asal

Peruntukan 2022: Agihan Anggaran Perbelanjaan Pembangunan

Sejumlah RM77.60 bilion diperuntukkan di bawah Anggaran Perbelanjaan Pembangunan bagi tahun 2022 bagi mendokong matlamat Kerajaan untuk memulih dan merancakkan semula aktiviti ekonomi dalam negara. Pecahan utama Anggaran Perbelanjaan Pembangunan adalah seperti di Carta 12.


Carta 12 : *Agihan Perbelanjaan Pembangunan 2022*



Perincian Anggaran Perbelanjaan Pembangunan 2022 Mengikut Sektor

Perincian Perbelanjaan Pembangunan dipecahkan mengikut sektor yang merangkumi sektor pentabiran, sektor ekonomi, sektor sosial, sektor keselamatan dan simpanan luar jangka, seperti di Carta 13. Agihan Anggaran Perbelanjaan Pembangunan 2022 memperuntukkan perbelanjaan terbesar di sektor ekonomi bagi memastikan kelangsungan perniagaan, sekaligus membantu ekonomi negara untuk bangkit dengan lebih perkasa dan berdaya saing serta berteraskan pembangunan negara yang lebih terangkum dan mampan.


Carta 13 : Agihan Peruntukan Perbelanjaan Pembangunan 2022 Mengikut Sektor



Perincian Anggaran Perbelanjaan Pembangunan 2022 Mengikut Sektor Pentadbiran

Sektor Pentadbiran diperuntukkan Anggaran Perbelanjaan Pembangunan berjumlah RM3.76 bilion dengan agihan kepada dua (2) Sub Sektor seperti di Carta 14. Sub Sektor Perkhidmatan-Perkhidmatan Am menerima peruntukan tertinggi berjumlah RM3.42 bilion bagi membiayai projek-projek pengkomputeran dan naik taraf bangunan.


Carta 14 : Agihan Anggaran Perbelanjaan Pembangunan 2022 Sektor Pentadbiran



Perincian Anggaran Perbelanjaan Pembangunan 2022 Mengikut Sektor Ekonomi

Sektor Ekonomi diperuntukkan Anggaran Perbelanjaan Pembangunan berjumlah RM40.20 bilion dengan agihan kepada sepuluh (10) Sub Sektor seperti di Carta 15. Sub Sektor Pengangkutan merupakan tumpuan utama Kerajaan bagi melaksanakan projek-projek infrastruktur, landasan keretapi dan menaiktaraf jalan. Sub Sektor Pengangkutan diperuntukkan sebanyak RM15.50 bilion bagi tahun 2022.


Carta 15 : Agihan Anggaran Perbelanjaan Pembangunan 2022 Sektor Ekonomi



Perincian Anggaran Perbelanjaan Pembangunan 2022 Mengikut Sektor Sosial

Sektor Sosial diperuntukkan Anggaran Perbelanjaan Pembangunan berjumlah RM22.67 bilion dengan agihan kepada Sembilan (9) Sub Sektor seperti di Carta 16. Sub Sektor Pelajaran dan Latihan menerima peruntukan tertinggi berjumlah RM11.95 bilion selaras dengan tumpuan Kerajaan kepada pembangunan modal insan. Selain itu, Sub Sektor Kesihatan dan Kependudukan turut menjadi tumpuan Kerajaan dengan agihan peruntukan berjumlah RM4.46 bilion.


Carta 16 : Agihan Anggaran Perbelanjaan Pembangunan 2022 Sektor Sosial



Perincian Anggaran Perbelanjaan Pembangunan 2022 Mengikut Sektor Keselamatan

Sektor Keselamatan diperuntukkan Anggaran Perbelanjaan Pembangunan berjumlah RM8.97 bilion dengan agihan kepada dua (2) Sub Sektor seperti di Carta 15. Sub Sektor Pertahanan menerima peruntukan tertinggi berjumlah RM5.42 bilion melibatkan projek penyenggaraan berskala besar aset-aset ketenteraan dan perolehan aset-aset ketenteraan. Sub Sektor Keselamatan Dalam Negeri juga menerima peruntukan yang tinggi bagi membiayai projek-projek antaranya di bawah Polis Diraja Malaysia dan Jabatan Imigresen Malaysia.

Carta 17 : Agihan Anggaran Perbelanjaan Pembangunan 2022 Sektor Keselamatan



Simpanan Luar Jangka

Baki Anggaran Perbelanjaan Pembangunan berjumlah RM2.0 bilion disediakan di bawah peruntukan Simpanan Luar Jangka bagi membiayai projek pembangunan yang memerlukan peruntukan tambahan di luar jangkaan.


Komitmen Jaminan Dan Liabiliti Kerajaan

Selain itu juga, daripada keseluruhan Anggaran Perbelanjaan Mengurus dan Pembangunan berjumlah RM311.10 bilion, sebanyak RM24.95 bilion diperuntukkan bagi membiayai komitmen jaminan dan liabiliti Kerajaan yang merangkumi bayaran *Public Private Partnership*-Unit Kerjasama Awam Swasta (PPP-UKAS) dan bayaran pinjaman yang dijamin oleh Kerajaan (GG).

Arah Aliran Perbelanjaan Pembangunan 2018-2022

Arah aliran Perbelanjaan Pembangunan bagi tempoh 2018-2022 meningkat berdasarkan kepada trend pelaksanaan projek/program bagi tahun 2018-2022 seperti di Carta 18.

Carta 18 : Arah Aliran Perbelanjaan Pembangunan 2018-2022




Nota: *Peruntukan Asal

Perbelanjaan Pembangunan 2018-2022 Mengikut Sektor

Perbelanjaan Pembangunan dibahagikan kepada Sektor Pentadbiran, Ekonomi, Sosial dan Keselamatan serta Simpanan Luar Jangka. Bagi tempoh 2018-2022, perbelanjaan yang terbesar diagihkan kepada dua (2) sektor iaitu Sektor Ekonomi dan Sektor Sosial. Kerajaan sentiasa memberi keutamaan dalam membangunkan ekonomi negara terutamanya peruntukan perbelanjaan pembangunan bagi tahun 2022 yang bertujuan untuk memulihkan ekonomi negara ekoran daripada pandemik COVID-19. Sektor sosial turut menjadi keutamaan bagi membantu golongan yang berpendapatan rendah dan terjejas.

Carta 19 : Peratus Perbelanjaan Pembangunan Tahun 2018-2022 Mengikut Sektor



Nota: 2018-2020 adalah merujuk kepada perbelanjaan sebenar manakala 2021-2022 merujuk kepada peruntukan asal

Pemetaan Perbelanjaan Kerajaan Persekutuan kepada Matlamat Pembangunan Mampan (SDG)

Seperti yang diumumkan di bawah Belanjawan 2021, peruntukan perbelanjaan tahunan Kerajaan Persekutuan akan juga dilihat melalui lensa Matlamat Pembangunan Mampan (SDG) bagi memantau pencapaian dan mengenal pasti jurang pembiayaan mengikut SDG. Merujuk kepada Jadual 1, kesemua SDG menerima peruntukan tambahan melainkan tiga (3) SDG yang mengalami sedikit kekurangan peruntukan. SDG berkaitan alam sekitar menerima penambahan yang ketara sejajar dengan tumpuan dasar Kerajaan untuk menangani isu perubahan iklim dengan lebih ketara. Berdasarkan Carta 20 pula, agihan terbesar bagi Peruntukan Anggaran Perbelanjaan Mengurus dan Pembangunan bagi tahun 2022 mengikut pemetaan SDG adalah kepada SDG 4 (Pendidikan Berkualiti) sebanyak 24.0% daripada keseluruhan peruntukan, diikuti dengan SDG 16 (Keamanan, Keadilan dan Keutuhan Institusi) sebanyak 20.9% dan Matlamat 3 (Kesihatan dan Kesejahteraan yang Baik) sebanyak 12.2%.


Peruntukan yang tinggi bagi ketiga-tiga SDG lebih tertumpu kepada pembiayaan projek infrastruktur seperti pembinaan bangunan sekolah, hospital dan klinik yang sememangnya memakan perbelanjaan yang besar. Oleh itu, ini tidak bermakna SDG yang menerima peruntukan yang jauh lebih rendah tidak diberi tumpuan memandangkan peruntukan bagi SDG berkenaan adalah bagi membiayai program bukan infrastruktur. Namun, Kerajaan amat prihatin terhadap kemungkinan terdapatnya jurang pembiayaan bagi beberapa SDG dan akan mengambil tindakan sewajarnya untuk menangani cabaran berkenaan supaya pencapaian SDG tidak terjejas.



Jadual 1 : Agihan Anggaran Perbelanjaan Mengurus dan Pembangunan Mengikut Matlamat Pembangunan Mampan

Matlamat Pembangunan Mampan (SDG)		2021	2022		
		Peruntukan Asal	Syor	Bahagian	Perubahan
		(RM bilion)	(RM bilion)	(%)	(%)
Matlamat 1	Tiada Kemiskinan	7.2	7.3	2.4	1.4
Matlamat 2	Kebuluran Sifar	5.3	5.5	1.8	3.8
Matlamat 3	Kesihatan dan Kesejahteraan yang Baik	36.6	37.7	12.2	3.0
Matlamat 4	Pendidikan Berkualiti	72.4	74.5	24.0	2.9
Matlamat 5	Kesaksamaan Gender	2.5	2.7	0.9	8.0
Matlamat 6	Air Bersih dan Sanitasi	5.1	5.3	1.7	3.9
Matlamat 7	Tenaga Mampu Bayar dan Bersih	3.5	3.5	1.1	-
Matlamat 8	Kerja Wajar dan Pertumbuhan Ekonomi	25.6	24.0	7.8	(6.3)
Matlamat 9	Industri Inovasi dan Infrastruktur	29.7	29.8	9.6	0.3
Matlamat 10	Pengurangan dan Ketidaksamarataan	12.3	12.0	3.9	(2.4)
Matlamat 11	Bandar dan Komuniti Mampan	25.7	24.3	7.9	(5.4)
Matlamat 12	Penggunaan dan Pengeluaran Bertanggungjawab	3.0	4.6	1.5	53.3
Matlamat 13	Tindakan Iklim	3.1	3.3	1.1	6.5
Matlamat 14	Hidupan Dalam Air	2.7	2.9	0.9	7.4
Matlamat 15	Hidupan di Daratan	3.4	3.7	1.2	8.8
Matlamat 16	Keamanan, Keadilan dan Keutuhan Institusi	64.2	64.5	20.9	0.5
Matlamat 17	Kerjasama Demi Matlamat	3.2	3.5	1.1	9.4
JUMLAH KESELURUHAN		305.5	309.1	100.0	1.2

Carta 20 : Agihan Anggaran Peruntukan 2021 dan 2022 Mengikut Pemetaan Matlamat Pembangunan Mampan



Nota: Tidak termasuk Simpanan Luar Jangka berjumlah RM2 bilion

Anggaran Peruntukan Pemberian Kerajaan Persekutuan Kepada Negeri Tahun 2022

Pemberian dan bantuan kewangan Kerajaan Persekutuan kepada Kerajaan-kerajaan Negeri disediakan di bawah Anggaran Perbelanjaan Mengurus yang merangkumi tiga belas (13) jenis pemberian dan bantuan yang dianggarkan berjumlah RM7.79 bilion bagi tahun 2022, meningkat sebanyak 3.2% berbanding tahun 2021 (RM7.61 bilion).

Carta 21 : Agihan Anggaran Pemberian Kerajaan Persekutuan Kepada Negeri Tahun 2022

